

四庫全書

集部

欽定四庫全書

集部

元氏長慶集卷四十四至八

詳校官監察御史_臣查瑩

檢討_臣何思鈞覆勘

總校官知縣_臣繆琪

校對官中書_臣雷純

謄錄監生_臣錢敬熙

欽定四庫全書

元氏長慶集卷四十四

唐 元稹 撰

制誥

楊元卿可涇原節度使制

門下士之捐妻子冒白刃勇於為國輕於為身貢先見之明於羣疑之際者太則書竹帛以示後次則建麾祭以臨戎功不見圖則勞者何勸忠不見賞則悖者何誅

聿求其人用激爾類守右金吾衛將軍權句當左街事

楊元卿衣冠貴胄文武長材嘗求三略之師耻學一夫

之敵是以陷豺狼之穴履尾甚危

元卿為吳少陽判官

蓄鷹鵠之

心卑飛待擊請分金以間楚願奉璧以伐虞

元卿奏事長安具以

淮西虛實及取元濟之策告

身以智全家因義喪

元濟殺元卿妻及其四男以圩射棚

誅蔡之始實有力焉及典方州尤彰績効自居環尹益

茂勲勤西旅未平實資良帥拔於不次式佇奇功爾其

闢我土疆謹我封守視我士卒如爾子攘我夷狄如爾

讐勉竭乃誠以敷朕意珥貂持簡用示兼榮可朝散大夫檢校左常侍使持節涇州諸軍事兼涇州刺史御史大夫充四鎮北庭行軍兼涇原等州節度觀察處置等使勲賜如故主者施行

牛元翼可深冀等州節度使制

門下鷹隼擊則妖鳥除弧矢張則天狼滅湯沐具而蟻虱相弔針石熾而癰疽立潰苟得韓盧而示之狡兔則可備俎豆而俟於脯醢矣復何憂於越逸乎夫將者亦

蟣虱之湯沐而渠魁之韓盧也我得之矣又何患焉檢

校右散騎常侍深州刺史牛元翼挺生河朔之間

趙州人

迴鍾海嶽之秀幼為兒戲營壘已成長學神樞風雲暗
曉衆推然諾已任功名善用奇兵尤精技擊陳安之矛

丈八顏高之弓六鈞或山立於軍前或肉飛於馬上而

又謙能養勇孝以資忠雖膽力過人而心誠許國自常

山作沴上將罹灾慟哭轅門誓清妖孽羽書三奏驛騎

四馳上請廟謀旁徵隣援指期斬叛尅日圖功斷自子

衷開懷用爾夫以爾之材力而取彼之凶殘是猶以火
焚枯以石壓卵螳臂拒轍難助承拳萬萬相殊破之必
矣而況於鎮之黎人皆朕之赤子爾之部曲即鎮之卒
徒聞爾輦鼓之音懷爾椒蘭之德吾知此輩誰不革心
爾其寒者衣之饑者食之無廢室廬無害農稼苟獲戎
首置之藁街下以報忠臣之寃上以告先帝之廟則蚩
蚩從亂予又何誅於戲殺人盈城爾其深戒孥戮誓衆
朕不忍言再換蟬冠特新武節恩不虛授爾其敬之可

檢校左常侍深冀等州節度觀察等使

授牛元翼成德軍節度使制

門下王庭湊山東一叛卒也非有席勲藉寵之資強大
結連之勢一朝驅朕赤子弄吾甲兵是猶以羊將狼其
下必當潰其心腹而猶越月踰時莫見春其喉者豈非
常山無帥趙子弟未有所歸耶翕而受之我有長畫檢
校左常侍深冀等州節度觀察等使牛元翼燕趙間號
為飛將望其旗幟者莫不風靡雨散圖其戰伐不可勝

書而又忠孝謹廉慈仁和惠愛養士伍均如鴈鳩鎮之
三軍爭在麾下自領深冀殷然雷霆居四戰之中堅一
城之守以少擊衆以智料愚鼓角不驚而梯衝自隕人
願為用寇不敢前掃吾氛煙捨此安往前所謂我有長
畫莫若命爾以來鎮人是用益以二州超之八座帥我
成德廉其四封爾宜來者懷之迷者諭之老者視之幼
者撫之狂者遏之逆者絕之惟是六者爾其懋哉可鎮
州大都督成德軍節度使深冀趙等州觀察處置等使

韓臯吏部尚書趙宗儒太常卿制

勅今天下官人之道或幾乎息矣禮樂之用又安能施
設於俗化哉是以選賢與能之柄或礙於胥徒冠婚喪
祭之儀不行於卿士蠹理害教斯孰甚焉改而更張我
則未暇就為之制其在於選任素重之望以鎮之乎金
紫光祿大夫檢校尚書右僕射韓臯銀青光祿大夫守
吏部尚書趙宗儒等仕宦臺閣周環大僚或三四朝或
五十載新進趨風之士更至迭處於將相間而臯等精

義不渝物務尤勁事朕小子猶吾祖宗肆予冲人庭實
彪炳夫銓鏡萬品不無勸勤簫韶九成頗延願養更用
舊老以均勞逸至於官業非予敢知祇聽法儀庶用咨
稟換保傳之重仍端揆之榮唯恐不多無以優異臯可
檢校尚書右僕射兼吏部尚書宗儒可守太子少傅兼
太常卿事散官勲封如故

趙宗儒可尚書左僕射制

勅銀青光祿大夫守太子少傅兼判太常卿事趙宗儒

昔叔孫通徒以綿蕝草具之功遂獲封侯之賞況朕始見天地初朝祖宗哀勵祗嚴不克是懼惟爾肇自清廟逮于還宮贊導法儀踰於四百俛伏趨數訖無尤違夫何叔孫可用是比顧朕冲昧實賴老成不有甄陞孰明勤盡奉常正秩左揆兼榮六樂九儀興替在此無忘勗率以厚人倫可檢校尚書左僕射兼太常卿散官勲如故

授韓臯尚書左僕射制

勅夫一邑之政而猶資老者之智用壯者之決况朝廷之大得不以耆年重望居表正之地以儀刑百辟乎惟爾金紫光祿大夫檢校尚書右僕射兼吏部尚書韓臯始以直言事代宗皇帝司諫諍復以文章政術事德宗皇帝為舍人中丞京兆尹在順宗憲宗時出領藩方入備卿長逮於小子厯事五君勤亦至矣而又處權近之位未嘗以恩幸自寵於一時當趣嚮之間終不以薄厚見窺於衆目豈所謂徐公之行已有常而詩人之風雨

不改耶日者銓覈羣才兼榮揆務頗煩倫擬有異優崇
罷去職勞正名端揆俾絕積薪之歎且明尚齒之心凡
百庶僚無忘咨稟可守尚書左僕射餘如故

授李絳檢校右僕射兼兵部尚書制

勅中大夫守御史大夫賜紫金魚袋李絳昔先皇帝誨
予小子曰堯時有神羊在廷屈軼指佞汝知之乎夫邪
正在人焉有異物朕有臣李絳猶漢臣之汲黯也我百
歲後爾其用之為神羊屈軼斯可矣予小子銘鏤丕訓

夙夜求思是用致理之初付授邦憲且欲吾丞相以降
皆俾下之以示優遇朕亦嘗命安其步武無為屑屑之
儀而絳屢以疾辭不寧其職又焉敢以勞倦之故煩先
帝舊臣昔晉僕射何季玄病足求免猶命坐家視事張
子孺拜大司馬仍令兼錄尚書則卧理不獨專於郡符
端右可以旁綏戎政由古道也爾其處議持平勉居喉
舌慎所觀聽為人司南可檢校尚書右僕射兼兵部尚
書散官勲封如故

元氏長慶集卷四十四

欽定四庫全書

元氏長慶集卷四十五

唐 元稹 撰

制誥

授王播刑部尚書諸道鹽鐵轉運等使制

勅漢諸儒議鹽鐵者百輩終莫能罷以其均口賦利則
貴賤盡征於王府矣而國家歲漕關東之粟帛以實京
師亦重事也并是兩者非才勿居劍南西川節度副大

使知節度事中散大夫檢校戶部尚書兼成都尹御史

大夫賜紫金魚袋王播昔我憲宗章武皇帝臬琳

楊惠琳

於夏擒闢

劉闢

於蜀縛錡

李錡

於吳而又繼之以元濟師道

之役十五年間蓋煩費矣然而資用饒而人不加賦朕

甚異焉謀及耆艾以求其故皆曰蜀帥播是時司筦權

者八年忠而能勤善於其職先皇帝咨訪委遇用之不

疑下竭其才而上專其任也是用徵自益部授之刑曹

復以舊務煩之式所以藉爾奉力之熟耳於戲知人則

哲憲考能之顧茲不明敢有貳事爾其追奉先眷佐予
冲人忠盡始終以服休命可守刑部尚書充諸道鹽鐵
轉運等使散官勲如故

授杜元穎戶部侍郎依前翰林學士制

勅元穎昔我憲宗章武皇帝熏灼威名兵定八極大索
俊乂以徵謀猷其在禁林尤集賢彥越正月夕庚子將
棄倦勤付朕渺末乃詔元穎佐予冲人以導揚丕訓爾
亦祇奉顧命咨授舊章輔釐哀憂俾克依據是夜而六

宮承式厥明而百吏受遺草定法儀茲實賴汝官不稱
事予懷慊然而又詞源與深機用周敏授之以詔而益
辦扣之以疑而益明慎獨以修身推誠以事朕職勞可
舉德懋宜升不俟踰時寧拘滿歲綸誥清秩版圖劇曹
例無兼榮特以甄寵予以國士待汝汝以忠臣報予効
乃肺肝司朕耳目可守尚書戶部侍郎知制誥依前翰
林學士散官勲如故

沈傳師授中書舍人制

勅書云臣作朕股肱耳目言天下不可一人理也令國
家崇建執事以任股肱妙選侍臣實司耳目股肱良則
心膂正耳目審則視聽明苟非端人何以近我而朝議
郎守尚書兵部郎中知制誥充翰林學士上護軍賜紫
金魚袋沈傳師潔淨精微風流儒雅名俱道勝信在言
前謙而愈光卑以自牧專對無不達羣居若不知而又
煥有文章發為辭誥使吾禁中無漏露之患而朕語言
與三代同風勤亦至矣事我滿歲命汝即真勉竭乃誠

以輔台德可守中書舍人依前翰林學士散官勲賜如故

崔稜可守尚書戶部侍郎制

勅朝議大夫權知尚書戶部侍郎判度支上柱國賜紫金魚袋崔稜惟朕憲考亟征不庭熏剔幽妖擒滅罪疾用力滋廣理財是切而姦臣乘上之急刻括以充其求帝用憫然思克攸濟乃詔南服傳置甚繁爾稜授以耗登之書俾陳生聚之術善於其職嚴而不殘辟名用物

者逃無所入滅私奉公者得以自明吏不敢欺人不加
賦公費當其所則不吝上求非其故則不獻挺直廉厚
真為吏師試可甄明歲滿當陟朕保其始爾思其終始
終不渝乃可用又可守尚書戶部依前判度支散官勲
賜如故

授裴向左散騎常侍制

勅周文王侍從之臣無可使結襪者我知之矣左右前
後無非令人朕以將壯之年臣妾天下司其愆速其在

於持重溫良之士以鑒之乎前陝號等州都防禦觀察處置等使中散大夫守陝州大都督府長史賜紫金魚袋裴向搢紳之徒言其閨門之行僅至於衣無常主兒無常父矣推是為政仁何遠乎

按本傳向能以學行持門戶內外親屬百餘口

祿俸必均世稱其孝睦

是以發自王畿至於陝服多歷年所終無

尤違每移孝友之風以懲強暴之俗甘棠之下廉讓興焉予欲用為垂瑞夾乘之官以代吾盤孟韋弦之戒不亦可乎可守左散騎常侍餘如故

崔郾授諫議大夫制

勅郾昔我太宗文皇帝以魏徵為人鏡而姦膽形於下
逆耳聞於上及徵沒而猶歎過失之不聞夫以朕之不
敏不明託于人上月環其七而善惡蔑聞豈諫爭之臣
未盡規於不德耶朕甚懼焉以爾郾端厚誠明濟之文
學柔而能立謙而逾光命汝弼予式冀無過於戲宋景
公一諸侯耳而陳星退之詞齊威王獨何人哉能辨日
聞之佞爾其極諫朕不漏言可守諫議大夫餘如故

白居易授尚書主客郎中知制誥制

勅先帝付朕四海九州之重尚賴威靈天下甫定思獲
論議文章之臣以自左右俾之詳考今古周知物情而
朝議郎行尚書司門員外郎白居易州里舉進士有司
升甲科元和初對詔稱旨翔翔翰林藹然直聲留在人
口朕嘗視其詞賦甚喜與相如並處一時由是召自南
賓序補郎位會牛僧孺以御史丞解制誥職嗣掌書命
人推爾先予亦飽其風猷爾宜副茲超異可守尚書主

客郎中知制誥餘如故

李拭可宗正卿韋虔度可殿中監制

勅李拭韋虔度等明皇而下其屬未遠諸王在閤朕得
時序其寒溫睿宗而上五十餘族長幼秩序盡委之於大宗
正苟非能賢不敢輕授以爾拭踐履中外論倫古今主
宗之盟綽有餘譽而執事者又曰殿中監總六尚以供
名物當進圭進爵之時不可虛位僉以虔度文學儒素
旁通政經執憲南臺挺直不撓以之代拭允謂其良仍

假左貂之冠加於宗正之首朕不敢無私於吾屬也拭
可檢校左散騎常侍兼宗正卿虔度可守殿中監餘如
故

裴武可司農卿制

勅農天下之本也故國有九列而司農氏居其一焉前
代非牟融之循理康成之儒學不在茲選今海內無事
思與公卿等樹立根柢以制四方是用外選方伯之善
職者入補茲任謂之恩榮具官裴武予聞其先始以孝

友書於國籍其後累有丞相為唐名臣賢彥因仍代濟
不絕武亦嗣其忠孝益熾家聲鬱為元僚所至稱理嘗
居內史屢入正卿自華至荆無非劇地鈐轄豪右衣食
煢嫠嚴而不殘仁而有制鎮定南服予方賴之而亟請
來朝因求內任嘉其戀我難奪乃誠假以秩宗之榮用
制國泉之重費而不屈其在勉之可檢校禮部尚書兼
司農卿餘如故

元氏長慶集卷四十五

欽定四庫全書

元氏長慶集卷四十六

唐 元稹 撰

制誥

盧士玫權知京兆尹制

勅朕日出而御便殿召丞相已下計事而大京兆得在
其中非常吏也誠以為海內法式自京師始輦轂之下
盜賊為先尹正非人則賢不肖阿枉奏覆隔塞則上下

不通假之恩威用訾豪右具官盧士攻自居郎署執政者言其溫重不回守法專固副內史事物議歸之日者

景陵

憲宗陵

將建龜筮有時予心怛然懼不克濟爾嘗倖

職應其供求和而不同檢而不溢竣於已事朕甚嘉焉
試命元僚亦既不撓今園丘甫及慶澤將施攘剽椎埋
必有幸生之者案牘卒吏亦當因緣為姦公費則多而
利不下究惟是數者爾司其憂為爾正名無吝操剗可
權知京兆尹餘如故

劉士涇授太僕卿制

勅卿寺甚重不易其人其或以勲以親以報以勸又何
愛焉檢校大理少卿駙馬都尉劉士涇去歲西戎跳

入涇上

時吐蕃
數入寇

京師戒嚴朕慨然有思慮頗李牧之

志而習事者言爾父司空

名昌

之在涇也築平涼等八城

二堡塹保定平原使涇人益樹麥禾以復后稷公劉之

教十有六年犬戎不敢東顧

貞元七年劉昌為涇原節
度使城平涼開地二百里

扼彈箏峽又西築保定扞青石嶺凡七城二堡
昌在軍十五年軍有羨糧兵械銳新邊安寧

朕聞其

人思見其後果有令子在吾懿親

士涇尚順宗女雲安公主

與之討

論自亦奇士鋪陳將畧殊有父風訪其班資則曰亞諸

卿之間嘗十年矣

時涇官少卿已十餘年

今乃除其憂服命以大

僚豈惟報爾先臣榮吾戚里亦欲使緣邊諸將視其愛
子為我竭誠可守太僕卿駙馬都尉餘如故

裴堪授工部尚書致仕制

勅書曰冲子嗣則無遺壽考朕以眇末憲章祖宗是用
錫于邦伯庶尹至于舊有位人式示知恩以期于理而

裴堪等奉事先帝無非舊老更厯中外備有典刑以疾
以年皆致厥政遺名自遂勇退推高並沐新恩例升榮
敘裨朕厥德猶俟安車可依前件

于季友授右羽林將軍制

勅具官于季友天子六軍必有材官欽飛超乘挽強之
士在焉董之以威待之以信分八舍之衆寡均二廣之
勞逸不吳不揚不掉不挫皆將軍之命也是以李大亮
上直禁中而文皇甘寢則心腹爪牙之任斯不細矣以

爾季友時予舊姻念往興懷度才思用榮以服色列于藩垣爾其敬恭無替朕命可守右羽林將軍知軍事仍賜紫金魚袋

邵同授太府少卿充吐蕃和好使制

穆宗即位遣秘書少

監田洎往告虜欲會盟洎含糊應之由是顯言洎許我盟我是以來逼涇一舍止詔右軍中尉梁守謙發神策軍合八鎮兵進援貶洎郴州司戶參軍以太府少卿邵同持節為和好使

勅邵同修好息人古之善政至於兵交而猶使在其間

况西戎舅甥之國為日久矣

自中宗以雍王守禮女為金城公主妻贊普世為舅

甥之
國前命使臣洎介臣賈持節訃告且明不侵不叛之

誠而洎等註誤戎王為國生事廢我成命咎有所歸而
猶彼國君長戒吏乞盟無言不酬思有以報以爾同科
甲言語職宣詞令備習地訓周知物情識汲黯之便宜
得月氏之要領命汝報聘達予深誠夫用爾之直去其
疎用爾之權去其詐用爾之剛去其忿用爾之慎去其
疑繼魏絳之和奮由余之智使朕高枕無西顧之憂者
在同此去同其勉之授以亞卿仍兼獨坐回無辱命賞

有彛章可守太府少卿兼通事舍人兼御史中丞持節
充入吐蕃答請和好使餘如故

元宗簡權知京兆少尹劉約行尚書司門員外

郎制

勅元宗簡劉約等敘彛倫節浮競必在於遷次有準以
崇廉讓之風是以置具員限資考而猶幸得貪求之士
不絕於埃塵間今古之常也聞爾等端靜廉雅行浮於
名非公事未嘗至於卿相之門何其自持之優也內史

貳秩重而不煩中臺諸郎清而無雜各勉榮授無移素
風宗簡可權知京兆少尹約可行尚書司門員外郎並
散官勲賜如故

劉師老可尚書右司郎中郭行餘守秘書省著
作郎制

勅侍御史內供奉劉師老郭行餘等曩者劉悟以全齊
之地斬叛來獻惟帝念功始以鈇鉞榮戟玄纛青旗命
悟建行臺於鄭滑得置軍司馬以下官屬妙選賢彥以

司謨猷師老行餘皆以天子命為悟僚介會悟遷領他
鎮爾等實來握蘭懷芸皆授清秩出入甄異又何加焉
師老可尚書右司郎中行餘可守祕書省著作郎餘如
故

楊嗣復權知尚書兵部郎中制

勅吏部郎中楊嗣復官天下之文武重事也兵部郎中
二員一在侍從不居外省旁求其一頗甚難之而執事
者皆曰近以文章詞賦之士為名輩由此者坐至公卿

閑達憲章用是稀少而吏曹郎嗣復州里秀異議論宏博宜其以所長自多然而操剝吏事細大無遺用副簡求允謂宜稱爾其試守茲任為予簡稽苟能修明旋議超陟可權知兵部郎中餘如故

鄭涵授尚書考功郎中馮宿刑部郎中制

勅二帝三王之所以仁聲無窮績用明而刑罰當也尚書郎專是兩者疇將若予僉曰涵文無害可以彰善惡宿思無邪可以盡哀矜庶尹百吏之能否四海九州之

性命用汝參斷汝其戒之夫刻則害善放則利淫滯則不通流則自撓惟是四者時考之難亟則失情緩則留獄深則礙恕縱則生姦惟是四者時刑之難八者不亂然後可以有志於理矣朕所注意爾其盡心可

高允恭授尚書戶部郎中判度支案制

勅允恭書云明德慎罰明猶慎之况朕不德茲用省于有司之獄莫不伏念隱悼周知其情惟爾允恭告我祥刑罔不率協稽爾明効陟于地曹

允恭以刑部郎中陟戶部

大比生

齒之書仍掌析毫之牘戎車方駕物力未豐剖滯應期
斯任不細推爾惟吝之意罔或失財用爾無害之文以
懲刻下吝不欲過過則不終文不欲繁繁則不逮率是數
者時維厥中可守尚書戶部郎中判度支案散官勲如故
高允恭授侍御史知雜事制

勅御史府不以一職名官蓋總察羣司典掌衆政副其

丞者是選尤難而御史丞僧孺

時牛僧孺為御史中丞例得奏除御史

首

以朝議郎守尚書戶部郎中判度支案飛騎尉高允恭

聞於予曰允恭始以儒家子能文入官在監察御史時
分務東臺無所顧慮為刑部郎中能守訓典復以人曹
郎佐掌邦計懸石允釐撓而不煩簡而不傲靜專動直
志行修明乞以臺郎兼授憲簡雜錯之務一以咨之朕
俞其言爾其自勉無俾僧孺狹於知人可以本官兼侍
御史知雜事餘如故

栢耆授尚書兵部員外郎制

勅守起居舍人賜緋魚袋栢耆朕聞亟遷則彛倫數滯

賞則勞臣怠兼用兩者謂之政經夫南憲右掖至於中

臺

耆先是由左拾遺守起居舍人今轉兵部員外郎

我朝之極選也俾爾環歲

之內周歷茲任豈無意焉元和中盜殺丞相疾傷議臣

齊冀之間交以禍端相嫁耆自青谿窖中提轉丸捍闔

之書馳於諸鎮

耆杖策淮西謁裴度願得天子一節掉舌定河北度為言遣之

使承宗

累年隔塞一朝豁然納質獻地克終於善承宗既沒承

元授事

徙義成節度使

耆又將朕教告命于承元萬衆無譁

時成

德軍以資錢不

至舉軍誼議一方底定此而不錄將何以勸凡百多

士無急病之心可守尚書兵部員外郎賜緋魚袋

元氏長慶集卷四十六

欽定四庫全書

元氏長慶集卷四十七

唐 元稹 撰

制誥

高鉞音弋可守起居郎依前充史館修撰何士乂

可尚書水部員外郎制

勅行而不息者時也久而不可泯者書也微史氏吾其面墻於堯舜禹湯之事矣尚書郎亦有會計奏議之重

非博達精究之才其可以充備茲選乎高鉞何士人等
富有文章優於行實據拾匡益殆無闕遺前以東觀擇
才因而命鉞視其所以足見書詞俾伺朕之起居遂編
之於簡牘不亦詳且實耶而士人亦以久次當遷移補
郎位允膺清秩無忘慎終鉞可守起居郎依前充史館
修撰士人可尚書水部員外郎餘如故

班肅授尚書司封員外郎制

勅朝議郎前坊州刺史賜緋魚袋班肅馳競之徒能於

寒暑之際不以憂畏移其薄厚之道者鮮矣聞爾為祠

部員外郎值吾黜姦之日遊其門者莫不跼竄奔迸懼

罹其身唯爾安分不渝進退有素

皇甫鏞貶崖州肅州以嘗僚獨餞于野搢

紳之論有以多之復爾中臺以厚吾俗勉慎其始無輕
所從可行尚書司封員外郎餘如故

獨孤朗可尚書都官員外郎韋瓘可守右補闕

同充史館修撰制

勅殿中侍御史充史館修撰獨孤朗左拾遺韋瓘汝等

皆冠圓冠曳方屨以儒服事朕朕甚偉之朗能彰善癉惡屬詞可觀瑾嘗旅進廷爭極言無隱求所以補朕過失從而記之而又書丞相已下百執事舉措以為來代法非爾而誰是用命爾遞遷諫列次補外郎竄定闕文裁成義類此仲尼春秋之職業也爾等自謂何如哉其可上下心手於愛惡是非乎朗可尚書都官員外郎依前史館修撰瑾可守右補闕充史館修撰餘如故

范季睦授尚書倉部員外郎制

勅權知倉部員外郎判度支案范季睦野有餓殍不知
發狗彘食人之食不知檢此經常之失政也而況於戎
車未息飛輓猶勤新熟之時豈宜無備乃詔執事聿求
其才乘我有秋大實倉廩僉曰季睦副予虛懷汝其往
哉予用訓汝夫廉賈五之不爭之謂也出納必吝有司
之常也貳上下之價則茫昧者受弊雜苦良之貨則豪
右者受贏惟一惟公乃罔不同惟平惟實乃罔不吉爾
其戒之無替朕命可尚書倉部員外郎依前判度支案

充京西京北糴使餘如故

楊汝士等授右補闕制

勅朕聞袞職有闕仲山甫補之蓋所以節宣天子之嗜
欲而彌縫其不及也我國家設司諫署以神明其耳目
凡在茲選實難其人監察御史楊汝士等文擅菁華言
無枝葉更佐大府為時聞人是用置爾於左右前後拾
遺補闕苟言之而不用時予之不明或抑之而不言惟
爾之不恪方我傾聽之始命爾司聰之榮各懋厥誠無

悼後悔可依前件

唐慶可守萬年縣令制

勅朝議郎守尚書比部郎中賜緋魚袋唐慶輦轂之下
豪黠僥輕擾之則獄市不容緩之則囊橐相聚是以前
代惟京令得與御史丞分進道路以其捕逐之急也執
事言爾慶權束池鹵生息倍稱布露飴散於籬落之間
而盜賊終不敢近推是為理真吾所求之劇令也無或
畏避以艱憚慶可守萬年縣令餘如故

飴鹽散鹽
見周禮

裴注等可侍御史制

勅諸道鹽鐵轉運東都留後兼侍御史裴注等法者古今所公共也一日去之則百職盡墜是以秦漢以降御史府莫不用剛果勁正之士以維持紀綱季代而還埋輪破柱之徒絕不復出朕甚異焉去歲以來比命御史丞為宰相益欲慰薦人之不敢為也爾等或以吏最或以文學當僧孺時僧孺為御史中丞慎簡之初遇朝廷渴用之日又安可迴惑顧慮於豪黠而姑以揖讓步趨之際為塞

職乎可依前件

李珣起復仍前監察御史制

勅前監察御史裏行李珣比制多以詳練法理者行於御史府或滿歲即真或不時署位亦試可之義也以爾珣文學周敏操行端方執喪有聞俯以就制復爾故秩勲修乃誠可行監察御史

王永可守太常博士制

勅前東都留守推官將仕郎兼監察御史王永朕明年

有事于南郊謁清宮朝太廟繁文縟禮予心惓然雖舊章具存而每事思問求可以教諸生習儀於朝廷者有司以永來上永其勉慎所職無令觀聽者有云可守太常博士

李從易可守宗正丞制

勅朝議郎京兆府士曹參軍李從易昔劉氏子孫在屬籍者十餘萬我唐光有天下二百餘年伯仲叔季幼子童孫可勝道哉第其賢能以次序昭穆皆吾宗寺之職

也凡在選任每難其人以爾天屬謹良修明吏理檢身
好學有儒者法儀宗長以聞朕不敢議承上莅下無忘
敬恭可守宗正寺丞

盧均等三人授通事舍人制

勅守門下省符寶郎賜緋魚袋盧均等辨色而朝百辟
輯瑞以會萬方正錯立族談之儀宣注意登庸之命鏘
鏘濟濟進退以時名為侍臣以贊導吾左右者通事舍
人之任也今郊丘有日事務方殷爾等各茂聲光副朕

茲選宜膺寵命無廢國容可依前件

顏峴可守右贊善大夫制

勅安邑解縣兩池摧鹽巡官監察御史裏行顏峴古者
公卿之子代為公卿所以貴貴也况賢者之後死政之
孤寧繫班資以礪升獎惟爾峴嘗與從父太師深犯蜂
蠆毒螫之下太師沒焉爾之不回幸而能脫終超逆地
來謁奉天魯公陷希烈軍中希烈逼使上疏雪已魯公
不從乃詐遣兄子峴與從吏數輩繼請德宗
報列聖念功訪求太師之後有司昧蔽不以爾聞今朕

將建東朝深思贊諭異時使朕愛子知忠孝之道如爾
峴吾何患焉可守太子右贊善大夫餘如故

荆浦授左清道率府率制

勅奉天定難功臣壯武將軍行右清道率府率上柱國
賜紫金魚袋左龍武軍宿衛荆浦等初朕宅憂西朝祇
受丕訓爾或執攜金吾清道前馬或操總戈戟立陞周
廬星拱翼舒誰何不若迺詔超陟因及序常用報有勞
且升久次各揚其職無棄厥司可

王惠超等授左清道率府率制

勅奉天定難功臣壯武將軍守右內率府率充左街副使上柱國王惠超等率侍衛以導從吾於黃麾左右者皆東朝之勤吏也乘我出震之憂逢時作解之慶咸當序進式示加恩並列周防宜勤夙夜可依前件

元氏長慶集卷四十七

欽定四庫全書

元氏長慶集卷四十八

唐 元稹 撰

制誥

崔弘禮可鄭州刺史制

勅朕讀詩至於羔裘緇衣之章未嘗不三復沉吟蓋明
有國善善之功且思舍命不渝之君子也春秋時鄭多
良士是以師子大叔之政而羣盜之氣潛消聞穎考叔

之言而孝子之心不匱山川在地日月在天今古雖殊
人存政舉文林郎守相州刺史兼御史中丞賜紫金魚
袋崔弘禮操心尚氣餘力有文感慨風雲號為奇士

傳稱

其磊落有大志通兵略

累更大郡備有休聲予聞則多未校其實

侍中弘正以課來上書為第一不有升陟何以獎能得
於信臣予用丕允郊圻密邇美惡日聞爾其歌雞鳴以
自勤稽風雨以守度與我共理副其所知可使持節鄭
州刺史餘如故

元佑可洋州刺史制

勅朝散大夫守京兆尹上騎都尉元佑風俗之薄厚由
長吏之所尚也聞爾佑以甲乙科為校書郎甚有名譽
前朝以先臣不幸為黜而自晦其身者十餘年何其為
己之多也自歷朝序仁聲益彰不雜風塵徽猷遂遠
洋州近郡美惡足以流京師將以慈惠祥和之道長理
之此吾有望於爾矣可使持節洋州刺史

袁重光可雅州刺史李踐方可大理寺丞制

勅盧國郡貫平羌江帶邛峽關西南蠻經緯之地也大
理寺專獄犴視刑書我國家生人之司命也任非其才
為患不細前廊坊丹延等州觀察判官侍御史內供奉
賜緋魚袋袁重光佐觀風於廊時聞有能名前湖南都
團練判官兼監察御史李踐方參練卒於湘中號為柔
順宜當慈惠之選且盡哀敬之心姑務勝殘無或枉撓
佇爾布政叶予好生重光可使持節雅州刺史散官勲
賜如故踐方可大理寺丞

齊熙可饒州刺史王堪可澧州刺史制

勅尚書刑部郎中齊熒岳州刺史王堪等隸江之西饒
為沃野澧亦旁荆之劇郡而鄱陽有銘銀擷茗之利俗
用僇輕政無刑威盜賊多有沅湘間沉怨抑激有屈原
遺風吏無廉平人用愁苦惟爾熒洎堪等皆踐臺閣亟
歷名部號為良能俾分兩地之憂佇聽二天之諺熒可
使持節饒州刺史堪可使持節澧州刺史餘如故

元薊等可餘杭等州刺史制

勅饒州刺史元奭等自天子至于侯甸男邦大小之勢
不同子育黎元其揆一也是以郎官出宰百里牧守入
為三公此所以前代稱理古也近俗偷末倒置是非省
寺以地望自高郡縣以勢卑自劣盤牙不解稂莠不除
比比有之患由此起今餘杭鍾離新安順政三有財用
一隣戎狄將有所授每難其人以奭之理課甄明以弘
度之奏議詳允以玄亮之學古從政以公達之守道立
身僉命為邦庶可勝殘而去殺矣敬奉詔條用慰煢獨

可

韓察等可明通等州刺史制

勅朕子育黎民懷乎懼一物之不至將我德澤流布于
遠邇者其惟良二千石乎前京兆府富平縣令韓察等
久於吏職皆著能名昔嘗奉詔條風聲尚在或厯居郊甸
惠養有方命汝臨人勿違其俗夫明近於海儒則姦生
通通於巴急則吏擾沔當津會滯則人怨推是三者引
而伸之然後可以憂人之憂矣爾其勉之

韋行立可處州刺史制

勅守衛尉少卿襲邢國公韋行立聞爾貴遊之子也出入省寺二十餘年終無尤違斯亦鮮矣江南諸郡戶籍非少皆有賦入之難爾為吾往理縉雲以宣朕化無虐惇獨俾傷惠和可使持節處州刺史

王進岌可冀州刺史制

勅元從奉天定難功臣行右羽林軍大將軍兼御史大夫王進岌冀方陶亮之所理也其俗質強有古人遺風

兵興已來習為奮武之地非勇毅仁隱之者不能兼牧
其畛以爾戰伐居多班資已重副朕茲選必有可觀夫
理亂繩唯緩之龔遂之政也忠信可以服暴強仲尼之
言也率是兩者以臨其人吾無憂於千里之內矣式兼
亞相周賁外臺可開府儀同三司使持節行冀州刺史
兼御史大夫充本州團練守捉使功臣勲封如故

論倚可忻州刺史制

勅前使持節守忻州刺史賜紫金魚袋論倚日者議鎮

之勞例皆甄獎有吏姚泌早聞其勤因以泌為忻州刺史會泌隱惡彰敗不終其任司空度上言前刺史倚忻人懷之復換他守人用不協遂仍命爾以復於忻勉居舊邦勿替前効可使持節忻州刺史

王元琬可銀州刺史制

勅夏綏銀等州節度觀察使檢校太子詹事王元琬河朔之間豐水草爾能當事多以畜擾為事吏二千石已上不能拊循競致侵削難其蹄角齒毛之異廉者半

價而買貪者豪奪其良困於誅求起為盜賊朕甚患焉

近以戎臣祐

李祐

旁領四郡奉宣詔條祐以元琬僉曰公

幹乞為固

魚巾切

陰罔或不臧貽祐之恥可使持節都督

銀州刺史充本州押蕃落使餘如故

陳諫可循州刺史制

勅封州刺史陳諫倜儻好奇之士常患於不慎所從負

累於俗過而能改人其捨諸

諫為王叔文之黨故云

以爾諫敏於

儒學志於政經自理臨封尋彰美化分憂是切滿歲宜

遷始求循吏之才以撫遠方之俗爾其樹德朕不記瑕
可使持節循州刺史

萬憬皓可端州刺史制

勅前順州刺史賜紫金魚袋萬憬皓赦所以宥不幸也
爾為郡守無違詔條而以疾罷去非不幸歟今朕還爾
符印俾臨高要之人守吾憲章懋則有辟可使持節端
州刺史餘如故

趙真長等加官制

勅臣藩洎逢吉尚書於陵所請劍南西川節度判官某
官趙真長等皆以文學政事得參公選觀其列狀尉薦
甚勤人各有知朕無不可矧以羊祜之風流盡在文翁
之學校復興咨爾真長等無替令猷勉當毗贊淮河之
師旅近息荆江之賦入素殷咨爾應等無瘵厥官以擾
生聚各揚乃職用副朕懷真長可行某官依前充職應
可某官充戶部巡官勾當河南河東等道兩稅餘如故
王沂可河南府永寧縣令范傳規可陝州安邑

縣令制

勅前汴宋亳穎等州觀察推官殿中侍御史內供奉賜
緋魚袋王沂前宣武軍節度推官監察御史裏行范傳
規等比制諸侯吏府罷則歸之有司以敘常秩近或不
時以聞謬異前詔朕申明之以復故典而去歲司徒弘
弘韓以沂等八覲因獻其能越在後庚之前且寵上台之
請命汝好爵時予加恩勉字邦畿無虐黎獻沂可河南
府永寧縣令傳規可陝州安邑縣令餘如故

吉改可守京兆府渭南縣令制

勅前河南府登封縣令吉改畿邦之宰任得其人蓋有
以入我黎庶足以張吾京師也自輦轂在鎬澠洛務輕
長令之善康東人者往往移隸內史今京兆尹季同
同以改有幹蠱之稱流聞于西遂陳換縣之求無替字
人之術可守京兆府渭南縣令

駱怡等復職制

勅前江州司馬員外同正員駱怡等一青而去其人則

改行自新之徒蔑由進矣况吏議不一負累多門原涉不必終於廉夫而周處卒為名士此亦曰曩時之明驗也爾等受譴既久省宥斯頻各勵日新以期天秩並復資品宜乎慎終可依前件

裴溫等兼監察御史裏行充清海軍節度參謀
制

勅前洛陽縣尉裴溫等南極北向戶北至于桂林旁帶邕容分置征鎮而南海尤居劇地舊制輒得臨莅諸管

參酌庶務茲惟郡僚溫等受知於人為報不易勤盡檢
白可以無瑕可依前件

韓克從可守太子通事舍人制

勅前河中府參軍韓克從聞爾之齒長矣而猶趨馳冉
冉其何以堪今命爾為東朝舍人以司贊引豈獨加之
恩獎抑亦示其優容宜勤厥官以服休命可守太子通
事舍人餘如故

崔方實可試太子詹事制

勅容州兵馬使試殿中侍御史崔方實蠻蜚之間有黃賊者跼竄窟穴代為侵攘南人患之為日固久而公素容管經畧使嚴公素破其酋長大獲俘囚檄奏以聞朕實嘉尚是用錫其使者金幣器服而又試為崇班俾耀遠人以勸來効可試太子詹事餘如故

李歸仙兼鎮州右司馬制

勅成德軍節度衙前馬步都知兵馬使檢校右散騎常侍使持節澶州刺史兼御史大夫充本州防禦使李歸

仙去歲成德換帥之際人皆効忠惟爾職在轅門位兼符竹功實居最議當甄升而弘正以牧長親人遙領非便司武故事兼可理戎並仍帖秩之榮式遂上台之請可檢校右散騎常侍兼鎮州右司馬替元闕兼御史大夫餘如故

齊煦等可縣令制

勅齊煦等今一邑之長古一國之君也刑罰綱紀約略受制於朝廷大抵休戚與奪之間蓋一專於令長矣然

而天下至大百吏至衆吾安能以一耳一目觀聽其短
長煦等皆奉詔條為人求瘼慰薦於爾豈某等皆欺予
各勉厥誠以臻于理煦可華州鄭縣令諷可越州剡縣令

韋珩等可京兆府美原等縣令制

勅韋珩等昔先王青災肆赦則殊死已降無不宥免而
受賄枉法者獨不在數常常罪之以此防吏吏猶有豪
奪於人者朕甚憫焉日者覃懷有過籍之賦使吾百姓
無聊生於下非珩等為吾發覺則吾終不得聞東人之

疾苦矣今美原藍田皆吾甸內之邑爾其為吾養理生
息以惠困窮使天下長人之吏知朕用廉激貪之意焉
珩可守美原令鄂可藍田令

裴誨等可充河南節度判官制

勅守京兆府醴泉縣令裴誨等昔實憲以元舅出征大
開幕府以致賢彥是以銘燕然備勲籍用參畫也爾等
佐釁斯任不細苟或無狀其思有尤

蔡少卿兼監察御史制

勅容管經畧左押衙兵馬使蔡少卿蠻之有黃賊者東南人之虺蜮也經畧臣公素隳_{他歷切}搃妖巢收復故地俾爾以如和縣等捷書來上道路悠遠其勤可嘉寵以憲官用光戎秩

李立則可檢校虞部員外郎知鹽鐵東都留後制

勅李立則國有移用之職曰轉運使每歲傳置貨賄於京師其大都要邑之中則委吏以專留事渥洛之間益

其一也而柳公綽言爾強白幹舉吏難其倫乞以臺省
官假借恩榮俾專劇務勉服所職無忘謹廉

常元亮等權知橋陵制

勅常元亮等大宗正言爾等或親或能備識其行誠盡
才辦可以修奉園陵吾先帝之衣冠所在夙夜思念哀
敬不忘爾其盡恭以勗諸吏

杜載可監察御史制


勅杜載西旅違言侵坑縣道雖有備無患而予心惕然

惟爾載奉捷潛奏乘驛以奔吉語亟來人用胥悅念毆
攘之畧誠在將軍獎飛馳之勞宜加憲秩歸語爾帥無
忘乃庸

崔蔭等可檢校都官員外郎兼侍御史制

勅崔蔭等自元和以來有大勲烈於天下先帝賚予以
保衡者唯司空度度亦齊慄祇畏不自滿大慎簡其屬
毗于厥政惟蔭及洙咸在茲選是用輟我糾察副其勤
求惟爾敬玄舊佐藩服効誠于長議以序遷我鐵冠

鼎鼎銀印受之以任其樂所從



元氏長慶集卷四十八

欽定四庫全書

集部

元氏長慶集卷

四十九至
五十三

詳校官監察御史_臣查瑩

檢討_臣何思鈞覆勘

總校官知縣_臣繆琪

校對官中書_臣雷純

謄錄監生_臣錢敬熙

欽定四庫全書

元氏長慶集卷四十九

唐 元稹 撰

制誥

范傳式可河南府壽安縣令制

勅范傳式御史府多以法律見徵苟覆視之不明於薄責而何逌傳式在先朝時嘗為監察御史會孫革以廐牧競田之獄來上朝廷意其未具復命傳式理之不能

精求盡以前却使岐人衆來告我職爾之由須示薄懲
用明失實嗟乎長人之吏信在言前當革非心無因故
態過而不改寧罔後艱

王昶等升秩制

勅王昶等乃祖乃父勤勞邦家佐吾先臣相國捍患摧
克世為勲籍故吾聞成德諸將心猶悚然爾等初喪元
戎能以衆整送迎新舊之際不無夙夜之勞言念功庸
宜升秩序榮以憲署命之崇班特示加恩匪用曩典

高 endpoint 等授官制

勅高 endpoint 等周官歲終則稽其醫事以制其食斯亦賞勞之意也爾等皆執藝術待詔公車和六飲六膳以會其時察五色五聲以知其變朕嘗因苦口必念沃心每思藥石之臣咸聽肺肝之語凡百多士無以美疢愛予因爾厥官用警有位

李昆可權知滑州司馬兼監察御史制

勅李昆日者王承元以成德喪師之狀來告爾實將之

能使承元之意上通朝廷之澤下究昆有力焉將議獎勞是宜加秩郡丞憲吏用表兼榮

劉頗可河中府河西縣令制

勅劉頗朕以自廊而北夷夏雜居號為難理乃詔執事求才以綏懷控壓之者皆曰頗在茲選且言其伐蔡之役常參謀於懷汝之師部分弛張允協軍政遂命試領銀州郡事衆庶寧附邊人宜之連帥以聞議請甄獎河西近邊擇吏惟精勿吝牛刀為我烹割

王迪貶永州司馬制

勅王迪為吏不廉受賄六十餘萬據其贓罪合寘重條
言者以為伐蔡之時陷其家屬適遭蜂蠆並為鯨鯢尚
念爾于茲當從末減議遷郡佐無忘悛心可守永州司
馬員外置同正員仍所在驛發遣

王悅等可昭武校尉行左千牛備身制

勅執千牛刀以侍奉吾左右者命子弟之選也莊憲皇
后姪王悅等或勲戚蔭餘或公卿貴胄佩觿有趨蹌之

美釋褐參侍從之榮勉奉我朝廷之儀敬順爾父兄之教

崔適等可翊麾校尉守左千牛備身制

勅三品子崔適等左右備身在吾旒宸之側非貴遊子弟之可親信者不在選中爾等閑閱甚崇教誨斯至事我猶事父畏法猶畏師勿惰勿佻以期無誨斯可與成人並行於朝廷矣

姚文壽可冠軍大將軍右監門衛將軍知內侍

省事制

勅姚文壽出入中外備嘗劇職靜以自勝高而益謙先
皇帝以其忠愿謹信知書有文每決務宮內付以密命
已事而復終無漏言朕方藉良能奪其情禮起自哀疚
命為監臨和而有常威而不侮修身處衆兩得其宜憂
服既除庸功可獎崇階厚秩兼以命之無忘慎修用副
毗倚

徐智爰可雲麾將軍右監門衛將軍知內侍省

事制

勅徐智爰邠之地后稷公劉之所理也俗饒稼穡土宜
六優內扞郊圻外攘夷狄故吾特命禮樂詩書之上將
俾為長城立監臨戎亦慎茲選以爾自更事任已著公
方端介而不失人心謙和而能宣朕命寵以將軍之號
仍加內省之榮復職舊藩勉終前効

邵常政等可內侍省內謁者監制

勅天子有內諸臣所以參侍奉備傳達而將外諸臣之

復也其或久更事任績効甄明者必擇其良能而分命
焉元從興元朝議郎行內侍邵常政等或扈從於艱難
之際或服勤著廉善之名宜序班資用優階秩夫奠東
司而臨象教爾無忘於肅清將成命以察我行爾無忘
於畏慎正闔閭以親賓客爾無忘於敬恭行是三者可
以長守其祿位而不離于榮近矣各揚爾職稱朕意焉

宋常春等可內侍省內僕局令制

勅近制選內臣之善於其職者監視諸鎮蓋所以將我

腹心之命達於爪牙之士也宣義郎行內侍宋常春等皆以謹信多才得參侍從更掌上府尤見吏能守官無毫髮之瑕勵已有冰霜之操跡其聲實可備監臨汝其往哉予用訓爾夫處衆莫若順犯衆則不安約身莫若廉奉身則不足推是兩者引而伸之然後入可以近天子之光出可以護將軍之旅矣罔或失墜以貽後艱勉當柱國之榮無忘立表之誓金寶可宣德郎行內侍省宮闈局令員外置同正員常春可徵仕郎內侍省內僕

局令員外置同正員

青州道渤海慎能至王姪大公則等授金吾將
軍放還蕃制

勅慎能至王姪大公則等洲東之國知義之道與華夏
同風者爾輩是也冒越深阻和會于庭予嘉乃誠命以
崇秩用奮威衛保爾恩榮無怠無違永作蕃服

青州道渤海大定順王姪大多英等授諸衛將
軍放還蕃制

勅大定順王姪大多英等我十有二衛將軍以率其屬
皆匡備左右為吾近臣自非勲庸不以輕授以汝各贊
琛賁勞於梯航俾耀遠人宜示恩寵歸撫爾類知吾勸
來

令狐楚等加階制

門下朕聞君法天大臣體君命數名等威上下以兩昔
漢丞相金印紫綬黃扉黑轡亦所以異車服于百辟也
今朕宰相階級不稱甚無謂焉既當行慶之恩宜用加

崇之典守門下侍郎同中書門下平章事賜紫金魚袋
令孤楚端慎嚴恪夙夜在公按度懸衡守而不失守中
書侍郎同中書門下平章事賜紫金魚袋蕭俛深敏敬
恭寤寐思理伏蒲焚藁知無不為守中書侍郎同中書
門下平章事賜紫金魚袋段文昌坦易堅白風雨有常
推賢舉能如恐不及咨汝三后弼予一人汝為股肱耳
目以賚予予敷心腹腎腸以告汝汝其一乃志以奉上
周乃惠以接下敬乃事以臨官是三者孫叔敖嘗用之

於楚矣位愈高而士愈戴祿愈厚而人愈懷夫以朕之
不敏不明尚克用濟實賴吾二三臣朝夕之誨詩云無
言不訓無德不報爰因進等之詔用申交警之詞各竭
乃誠同底于道康天下平太階而後越級之賜行焉茲
謂叙常非以為報楚可太中大夫俛可朝議大夫文昌
可中散大夫餘各如故

蕭俛等加勲制

某等越正月惟朕憲考集大命于朕躬宅憂昏逾罔克

攸濟惟爾俛屢贊大儀以詔予一人惟爾文昌作策度
以道揚末命俾小子審訓弗違時乃之休王功曰勲茲
用報汝尚克納誨毋忘協心銘于太常永作元輔

蕭俛等加封爵制

門下列爵惟五所以褒有德也朝議大夫守門下侍郎
同中書門下平章事上騎都尉襲徐國公賜紫金魚袋
蕭俛等外撫四夷內順百度同德比義以堯舜之道事
予厥惟懋哉遂行益地之詔俛乃讓封於弟亦協推恩

開國承家永綏厥後惟克恭敬以和神人

李逢吉等加階制

某官李逢吉是朕皇子時侍讀也忠孝之訓何嘗忘之
惟秘洎璿寔惟藩臣克壯威猷用以垣翰楊造等祇事
內外夙夜惟寅並沐前恩遞升榮級上下有等式示彝
章

李光顏加階制

門下朕聞有天下者道德仁義以為理城郭溝池以為

固故曰不教人戰是謂棄之有備無患可以應卒此先
王毆攘戎狄保障黎元之大畧也五原居有夏靈慶之
中當地豕豺狼之突將搯咽喉之要爰命腹心之臣厥
有成功宜膺茂典邠寧慶等州節度觀察處置等使金
紫光祿大夫檢校司空兼邠州刺史上柱國武威郡開
國公李光顏氣敵三軍心師百行有卞莊之勇守之以
仁有日磾之誠濟之以武叱咤則風雲迴合閒宴則樽
俎周旋蓋文武之令才真古今之良將是以淮蔡之役

百勝功高青齊之師一面居最朕以蕭關尚警馬嶺猶虞五餌之詐可羞百雉之城爰度先是屬役每難其人惟爾良能果諧予願程功而不憊于素訖事而不勞于人比命有司褒乃實力僉曰古諸侯勲德優盛則就加特進以寵之我國家封植崇重有朝請一字以異之予嘉乃勤兼用兩者茲謂上賞爾唯欽哉可特進餘如故

王仲舒等加階制

門下階陞所以升堂奧也歷清貫者亦由是而登進焉

國朝由散官而命為大夫者凡十一等以銀青朝散為
名者非我特制則不克授蓋門戶有榮戟之榮腰佩有
龜綬之異也朝議郎守中書舍人王仲舒等或歷職清
近代予格言或分命藩方宣我程品或縣懸車以請老
或持節以臨人或親或能或勞或久皆承需澤之慶宜
當並命之榮凡爾四十有三人各服我休命並朝散大
夫餘如故

郭釗等轉勲制

粵若十有二勲以馭親賢以詔勞舊以稽秩序以行慶
賜而刑部尚書兼司農卿郭釗實我元舅寅亮朕躬傳
師洎肇共司予言發揚書命倭貳教官長財善物証居
環尹夜警書巡堪致厥政時惟舊老高陽而下五十有
六人分命內外祇勤于理越二月發大號于天下延寵
庶官錫爾崇勲無替嘉命

武儒衡等加階制

某乙等古人以朝散大夫為榮是以自矜於歌詠況今

由是級者則服色驟加誠足貴矣儒衡等皆吾內外之臣並在賢能之選項因慶澤第許崇階朕不食言勉當嘉命

崔元略等加階制

某官某乙階之設二十有庸有事有叙有加用是四者以詔百吏由鄆而上至于元略曰加曰叙進而下至于景曰事曰庸光我侍從之臣且優致政之老詔賢詔德於是乎在堂與益近爾其敬之

胡証等加階制

門下寧遠將軍兼左金吾衛大將軍御史大夫充左街使賜紫金魚袋胡証等近古赦天下則勲秩階爵因緣而行亦欲與卿大夫同美利也爾等率其屬部分義甚明皆吾勞臣是有恩獎益進榮級宜其允恭

諸使收淄青叙錄將士等授官爵勲制

某等能執干戈討定逋孽功懋懋賞厥惟舊哉分命庶官秩建五等次用于十有二勲式示等威蓋以勞之小

大為上下也

劔南西川節度使下將士史憲等叙勲制

門下劔南西川節度使下准制叙勲將士朝議大夫試
太子家令上護軍史憲等蜀形勝之地也南控蠻蜚西
搯我羌厲禁之勞實賴汝三千八百六十有六人之力
使之必報並賜崇勲各懋乃誠勗率以敬

鄭氏封才人制

勅古者天子設六宮以詔內理是以關雎樂得淑女憂

在進賢將聽雞鳴之詩豈惟魚貫之序鄭氏山東令族
海內良家每師班女之文嘗慕樊姬之德桃姿焜耀蘭
行馨香爰用擇才冀無傷善勉當選進之重無忘和平
之心

七女封公主制

門下長女等抱子弄孫之榮貴賤之大情也朕以四海
奉皇太后於南宮問安之時諸女侍側螽斯之慶上慰
慈顏鴈鳩之仁內懷均養雖穠華可尚出閭末期而湯

沐先施分封有據宜加美號以表令儀

王承宗母吳氏封齊國太夫人制

勅古成德軍節度鎮冀深趙等州觀察處置等使金紫
光祿大夫檢校尚書左僕射贈侍中王承宗母燕國太
夫人吳氏魯文在手燕夢徵蘭道以匡夫仁而訓子教
日殫竭誠之操義必資忠戒陳嬰自大之心明於處順
是以承宗辭代之際承元領務之初或輟哭以據床每
形言於憂國人知趣向道實光明宜受進封之恩用表

貫霜之節

元氏長慶集卷四十九

欽定四庫全書

元氏長慶集卷五十

唐 元稹 撰

制誥

李愬妻韋氏封魏國夫人制

勅夫尊於朝婦貴於室由古道也安有邦君之妻而無
湯沐之地乎涼國公李愬妻韋氏德宗皇帝之外孫也
笄年事愬克有令儀天陰雖高猶執婦道持其門戶使

愬有姻族之和奉其頻繁使愬有烝嘗之潔愬當分閭之際終無內顧之憂者由此婦也今愬積行累功以致爵位六遷重鎮愬歷為隋唐鄧山南東道鳳翔武寧昭義魏博六節度使名列上台而韋氏猶限彛章未嘗開國甚不稱也因愬大名之邦式建小君之號可封魏國夫人

贈田弘正等父制

門下朕聞昔者明王之以孝理天下也莫不因嚴以教敬推類以明恩朕以渺身欽承大寶為億兆人之君父

奉十一聖之宗祧捧烏號知羣臣有良弓之思瞻彼蒼
念羣臣有所天之感是用仲月五日申命有司大錫追
崇式彰餘慶而魏博等州節度觀察處置等使魏州大
都督府長史田弘正亡父贈兵部尚書庭玠等教必以
忠歿而不朽茂仲弓之德而位屈當年副孔父之恭而
福流來裔惟爾弘正為朕方叔以殿大邦惟爾夷簡為
朕河間

李夷簡宗室
宰相故云

以光宗籍惟爾度為朕呂望以司

專征子有勞於王家父豈忘於錫命進以師長之贈加

之保傳之尊咨爾三臣告是五廟永錫忠孝賚于邦家
可依前件

贈烏重胤等父制

勅朕聞水積者不涸德積者不窮肆我高祖武皇帝傳
序累聖逮予冲人嗣守朝廷之常不克是懼而侯甸藩
服亦克用乂誠賴吾邦伯庶君之不墜吾祖宗之典也
追念本始無忘爾先永錫追榮用章彝訓檢校司空使
持節滄州刺史烏重胤亡父贈工部尚書承玘等根本

粹茂源流浚發載誕頗牧降生申甫或並列藩方或常
參鼎鼐承我制詔備陳孝思皆曰閱禮資忠實賴先臣
之教欲報之德願言克從遂命褒崇以示幽顯可依前
件

贈韓愈等父制

勅國子祭酒韓愈父贈秘書少監仲卿等子生則射桑
弧蓬矢以告四方三月孩而名之十年出就外傳孔子
雖欲遠於鯉也而猶教之詩禮所以相承先而重後嗣

也然而免水火之災從師友之後服軒冕以為卿大夫者一族幾何人惟爾愈雄文奧學秉筆者師之與某等各用所長列官朝右榮則至矣其父皆不及焉歿而有知能不望顯揚於地下贈以崇秩慰其幽魂推吾永懷示用怛然於此可依前件

贈韋審規等父制

勅朕嗣立之二月五日在宥天下澤被幽顯凡百執事延崇于先而守尚書左司郎中韋審規父大理卿漸等

生有列爵歿有懿行德積于身慶儲于後嘉乃令子為
吾望郎遂可有司之奏以錫先臣之命可依前件

贈田弘正等母制

門下檢校司徒田弘正母贈韓國太夫人鄭氏等詩云
哀哀父母生我劬勞欲報之德昊天罔極子欲養而親
不待之詞也朕有臣弘正等皆社稷之臣也或寄重股
肱或親連肺腑而克忠于國克孝于家歌康公念母之
詩感日碑見圖而泣朕方推廣孝以闡大猷迺詔有司

深惟贈典若曰幽魏并楊實鎮之大既以命于勲賢齊
晉清河惟號之美可用光於窀穸永錫爾類予何愛焉
嗚呼子為列嶽之崇母用追封之禮亦可謂生榮死哀
孝子事親之終也惟爾欽哉無或失墜可依前件

追封孔殽等母制

勅潁考叔食羹而思遺其親此孝子不違於一飯也而
況於萬石在前累茵在側慰心不及非贈而何尚書吏
部侍郎孔殽母贈扶風郡大君韋氏等柔以睦姻明於

訓子惟嬪之禮始自敬姜擇鄰之規優於孟母慶鍾嗣
子皆我蓋臣祇告有司丕序先烈錫以大邑達其深誠
庶無風樹之嗟且壯秋霜之節可依前件

追封李逢吉等母制

勅孝子之於事親也貧則有啜菽之歡仕則有捧檄之
慶離則有陟屺之歎歿則有累茵之悲推而言之其揆
一也不有追錫何以達情檢校吏部尚書使持節襄州
刺史李逢吉母贈平陽郡太夫人王氏等皆朕公卿之

母也或象感台階生申及甫或氣鍾河嶽非龔則黃出入恩榮羽儀中外苟無善訓安得令人簡想徽猷用弘封邑式光子道以盛母儀可依前件

追封李遜等母制

勅檢校禮部尚書使持節許州刺史李遜母贈義封縣太君崔氏等昔康公貴為諸侯而念母之詞甚悲悲親之不逮也曾參仕三釜而其心甚樂樂及於親也今遜等有地千里有祿萬鍾頤指氣使無不隨順所不足者

其惟風樹寒泉之思乎朕方推廣孝豈吝加恩並封啟
邑之榮咸慰循陔之念可依前件

追封王潛母齊國大長公主制

潛父繇尚玄宗
女永穆公主

勅檢校兵部尚書王潛母贈晉國大長公主於朕祖宗
之姑姊妹也始以肅雍之德下嫁於公侯淑問怡聲禮
無違者訓其愛子有過嚴君不因恩澤以求即每致忠
貞而事主使勤貴富戒斂廉能鬱為勲臣實資聖善徽
猷盡在典禮宜加猶狹平陽之封式廣營丘之地克宣

朕命用慰潛心可贈齊國大長公主

追封王璫等母制

勅守起居舍人賜緋魚袋王璫母贈成紀縣太君李氏等古人云生願為人兄欲奉養之日長也若此則及子之貴顯親之榮能幾何人是以聖王因心以設教由是揚名追孝之禮生焉朕宅帝位思弘大孝乃詔執事追用疏封而璫等皆以諷賦語言得參侍從欲報之歎發乎肺肝追加啓土之榮用深罷社之痛可依前件

贈鄭餘慶太保制

勅朕聞仲尼歿而魯公誅之柳莊死而衛靈請往夫以
區區魯衛而猶念賢臣碩德也如是況朕小子獲承祖
宗實賴一二元老朝夕教誨以儀刑于四方天胡不仁
遽爾殲奪而今而後誰其屏余故金紫光祿大夫檢校
司徒兼太子少師鄭餘慶始以衣冠禮樂行於山東餘
力文章遂成儒學出入清近盈五十年再任台衡貞元十四
年拜中書侍郎同平章事元和屢分戒律歷為山南西
元年復以尚書左丞同平章事道鳳翔節度

使凡所劇職無不踐更貴而能謙卑以自牧審直行於
臺閣柔睦用於閨門受命有考父之恭待士有公孫之
廣焚書逸禮盡所口傳古史舊章如因心匠朕方咨稟
庶罔昏逾神將祝予痛悼何及乞言既阻贈典宜加追
書保養之榮用彰明允之德可依前件

贈賻王承宗制

勅天子之於百辟也公則有君臣之義私則有父子之
恩生則有列爵以報功沒則有加榮以錫命遠則罷朝

以申悼近則幸第以臨喪而況於代濟勲庸時方委遇
死而可作吾何愛焉故檢校尚書右僕射王承宗海岱
孕靈弓裘襲藝詩書禮樂稟訓於祖先勇敢謨猷自生
於誠腑逮居劇鎮益辨長材每懷戀闕之誠遂行割地
之効屢陳密款方俟來朝天不與年素志沒地表章前
上忠懇備存不以二子為憂且曰三軍求帥承元繼志
雅有兄風雄藩既耀於連枝寵秩宜加於幽窆上台之
首左輔之崇特越彛章用明加等忠魂尚在期爾有知

可贈侍中仍令所司備禮冊命賻布帛五百段米粟三百石委度支逐便支送

贈賻裴行立制

勅秦郡守分土疆以牧人漢刺史乘軺車而按部兼是兩者才惟艱哉而況於鎮定遠荒經畧逋寇毗倚方切忽焉薨殂為安南都護召還道卒不有追崇曷彰懷悼故朝散大

夫持節桂州刺史兼御史中丞裴行立積德之門代濟英哲班超奮筆志在功名鄙寄秉心義先忠孝累更事

任益見良能龔遂著稱於潢池處默去思於交趾遺風
尚在錫命宜加寵以貂蟬賻之穀帛用光幽宥式慰營
魂可贈左散騎常侍賻布帛三百段米粟二百石仍委
度支逐便支送

贈陳憲忠衡州刺史制

勅故元從奉天定難功臣柳州刺史陳憲忠在德宗時
執羈勒以從遂加戡難之名在憲宗時沐雨露之恩實
被念功之詔朕敬承先志崇獎舊勲爰命有司用申常

典生有熊當其軾歿有雁隨其車可謂男子之哀榮矣
可贈使持節衡州諸軍事衡州刺史

贈楚繼吾等刺史制

勅故容州本管經畧招討左押衙兼行營中軍兵馬使
檢校太子詹事楚繼吾故廉州古丘營鎮將試殿中監

衛弘本等比以荒服不虔侵掠縣道乃詔毅勇

蠻賊黃少卿自

貞元以來數為寇害貞元十四年桂管觀察使裴行立
容管經畧使陽旻爭請討之上詔二管大發江湖兵會
討士卒瘴癘死者不可勝計安南乘之遂殺都護
及官屬部曲千餘人繼吾等想亦以此時遇害
為人

毆攘而繼吾等奮不顧身深入巢穴豺狼雖殪蜂蠆誤
加方聞振臂之雄忽有歸元之歎其帥具上其功伐請
議褒崇言念云亡尤用憫悼不有異等孰以勸忠特追
有土之榮用明死政之節繼吾可贈使持節都督容州
諸軍事容州刺史弘本可贈使持節都督邕州諸軍事
邕州刺史

更賜于頔

音狄謚制

昔羽父為無駭請謚於魯侯而衛君亦自稱公叔文子

之跡則考行必在於有司賜謚或行於君命久矣故致

仕太子賓客燕國公于頔祇奉三朝

順憲穆

橫鎮襄漢雖

便宜從事難以法繩

頔為山南東道節度使慢上持下有專漢南意

而武毅立

名實為威克來朝而後

憲宗立始入朝

亦既降心敬以事君明

能知子朕以禮存錫命恩在展親

憲宗女惠康公主下嫁頔次子季友考

以慮深通敏之文參用追悔前過之義深詔執事宜謚

曰思

始太常謚頔曰厲後季友從穆宗獵苑中求改父謚會季愬亦為之請改賜今謚

追封宋若華河南郡君制

勅司徒之妻有禮齊加石窀延鄉之母有德漢置封丘
生既不渝沒亦宜及故宋若華我德宗孝文皇帝躬勤
庶務寤寐以之乃命女子之知書可付信者省奏中宮
而若華等伯姊季妹三英衆分皆在選中參掌宥密班
妃裂素之詠謝氏散鹽之章琤然玉音記在彤管先皇
帝乙夜觀書之際亦嘗傳窈窕德象之篇於若華言念
云亡禮宜加等特追封邑豈礙彞章可贈河南郡君

授入朝奚大首領梅落悟孤等二十五人官階

制

勅某等各以貴寶會於明庭既飲食以勞之又爵秩以
遣之式所以示懷柔於遠人也爾宜將我皇風慰彼黎
獻可依前件

授入朝契丹首領達于只枕等二十九人果毅
別將制

勅朕聞德教加于四海則遠人斯屆余德不類而爾等
寔來良用愧于厥衷是以置野廬以勞其勤委舌人以

通其意始於郊迓還以禮成寵秩仍加厚意斯在被服冠冕無忘敬恭可各授

劉惠通授謁者監制

勅宣議郎內侍省官閒局令賜緋魚袋劉惠通愿吾愛之俾在左右將我密命達於四方去盡行人之詞還致諸臣之復言必忠信事無尤違使朕不出戶而知三軍之意者爾有力焉深念其勤將以為報階秩兼進用示恩榮可依前件

元氏長慶集卷五十